

Opinion Jossy M. Mansur

E programa di Nancy Grace

Mi ta tende asina hopi cos tocante e programa di Nancy Grace, cu mi kier a ilustra mi opinion tocante Nancy y su programa. Mi a yega di aparece como un di su huespednan, y cuanto biaha cu e pidimi lo mi bolbe aparece pasobra ni e ni ningun otro entrevistador ta intimidami. Ademá, mi no ta bay su programa pa discuti cune, sino djis pa contesta su preguntanan.

Kico cu ser papia den su programa contra Aruba ta bin principalmente di un of otro di su invitadonan, y den algun ocasion di dje mes, sin cu esey kier meen cu ta personahenan di Biblia ta papiando "ex-catedra". Nan ta humanonan bibando den un democracia grandi cu ta probecha di e libertad di expresion cu ta existi den nan pais pa duna nan puntonan di bista. Mescos cu ami ta duna esun di mi, ta perfectamente aceptable pa nan duna esun di nan, sin interferencia di mi parti, pa desagradable cu nan opinionnan por ta.

Kico mi ta pensa di Nancy Grace? Mi ta considere un bon presentador di pro-

grama, cu a desaroya un estilo propio, unico, basa riba confrontacion y discusion cu algun di su huespednan, y cu no ta bay cambia e estilo ey pasobra ami of cualke otro Arubiano ta aparece den su programa. Ademá, mi no tey pa bringa cune o cu su invitadonan, sino pa contesta e preguntanan cu e ta hacimi directamente. Cu mi ta gusta loke nan ta papia di Aruba? Claro cu no! Pero, mi no kier usurpa tampoco nan derecho di tin un opinion contrario na esun di mi y di exprese libremente, sea cu e ta basa riba realidad o riba suposicion o creencia falso.

Mi a bisa claramente den su programa cu ami si ta convenci cu nos tin un bon Cuerpo Policial, cu mi tin pleno confianza den nan, cu mi ta asegura cu nan ta haciendo nan best pa resolve e misterioso desaparicion di Natalee. Otronan den su programa no ta pensa mescos, pero esey ta nan asunto. Mi ta sigur cu e Pueblo Americano cu conoce Aruba, cu sa con nos ta trata nos invitadonan, cu a yega di bin nos isla den tanto ocasion, lo re-

sponde e criticanan pa nos na Merca. Y nan ta haciendo esey caba!

E diferencia di opinion cu mi tin cu nan ta cu nan ta huzga nos Cuerpo Policial en base di e caso di Natalee so, mientras cu ami ta huzga nan a traves di 32 aña di actividad periodistico, mirando nan labornan positivo y profesional durante tur e añanan ey. Ta con mi por bay bisa cu L.A.P.D. no ta competente djis pasobra den un caso, un agente a lubida di lesa e "Miranda rights" na un sospechoso? Ta con mi ta bay bisa cu N.Y.P.D. ta incompetente djis pasobra den un caso specifico nan no por a haya un asesino den menos di tres luna? Bo no por huzga e capacidad di un Cuerpo Policial usando un solo caso, sino a base di e rendimiento global di nan actividadnan policial!

Mi ta convenci cu e caso di Natalee lo haya solucion, apesar di e obstaculonan cu intencionalmente o sin intencion a surgi durante e investigacion. E berdad lo triunfa na final y tur hende ta bay haya sa kico a pasa cu Natalee.

Peticion di abogadonan a wordo rechaza

FBI no ta hayando documentonan

ORANJESTAD(AAN): Ayera na corte tabata tin varios medio di prensa un biaha mas dilanti, na banda y patras di corte.

Ta asina cu veredicto den e caso di apelacion cu e abogadonan di e sospechosonan den e caso di Natalee Holloway a entama, pa loke ta envolvimento di FBI, lo wordo duna.

Banda di esaki, e famoso Jardinero, kende ta testigo cu a bisa cu el a wak e Kalpoe nan y Joran banda di Racket Club, a presenta na corte pa duna su declaracion, dilanti di fiscal mayor Huez, abogado y sospechosonan.

Pa loke ta e veredicto, DIARIO a logra di localisa abogado David kock kende ta den exterior, pa e splica e decision di Huez Comisario.

Kock a splica cu e huez a bisa cu FBI oficialmente no ta parti di e investigacion na Aruba, unda cu nan no ta haya ningun clase di documento.

Loke nan ta haya ta videonan di interrogacion di Joran y esunnan di e rumannan Kalpoe, pa nan duna nan



opinion.

Pues segun huez comisario esaki pues no ta contra ley. Pa e motibo aki el a rechaza peticion di e abogadonan, sinembargo el a bisa cu den su decision e ta "trek recht" cierto cosnan manera e echo cu no ta asina cu FBI ta haya documento y cu oficialmente nan ta parti di e investigacion. Esaki ta pa evita futuro discusion ariba di e asunto.

Abogado Oomen a keda satisfecho cu loke Huez Comisario a dicidi, sinembargo abogado Kock ta bisa cu e no ta totalmente sigur si FBI di berdad no ta haya e documentonan, sinembargo el a bisa cu e lo mester confia palabra di e Huez Comisario.

En total e caso aki a dura for di 2'or te cu casi 6 'or di atardi.